

যুগান্তর

শাবিতে শিক্ষক শিক্ষার্থীদের প্রতিবাদ কর্মসূচি অব্যাহত

সিলেট জেলা বিএনপিসহ বিভিন্ন সংগঠনের নিন্দা প্রতিবাদ

প্রকাশ : ০৬ মার্চ ২০১৮, ০০:০০ | প্রিন্ট সংস্করণ



সিলেট ব্যুরো ও শাবি প্রতিনিধি

শিক্ষাবিদ অধ্যাপক ড. জাফর ইকবালকে হত্যাকাণ্ডের প্রতিবাদে সোমবার দ্বিতীয় দিনের মতো ক্যাম্পাসে বিক্ষোভ, মানববন্ধন ও কর্মবিরতি পালন করে শাহজালাল বিজ্ঞান ও প্রযুক্তি বিশ্ববিদ্যালয়ের শিক্ষক-শিক্ষার্থীরা। সকাল ১০টায় ড. এম ওয়াজেদ মিয়া আইআইসিটি ভবন থেকে মৌন মিছিল শেষে ও মানববন্ধন করেন সাধারণ শিক্ষার্থীরা। পরে তারা কেন্দ্রীয় গ্রন্থাগারের সামনের রাস্তায় অবস্থান কর্মসূচি পালন করেন।

বেলা ১১টা থেকে দুপুর ১টা পর্যন্ত কর্মবিরতি পালন করে বিভিন্ন বিভাগের শিক্ষকরা। কর্মবিরতির পাশাপাশি প্রশাসনিক ভবন-২ এর সামনে অবস্থান কর্মসূচিও পালন করেন তারা। শাবি শিক্ষক সমিতির সাধারণ সম্পাদক জহীর উদ্দিন আহমেদের সঞ্চালনা ও সভাপতি সৈয়দ হাসানুজ্জামানের সভাপতিত্বে অবস্থান কর্মসূচিতে ভিসি অধ্যাপক ফরিদ উদ্দিন আহমেদ, কোষাধ্যক্ষ অধ্যাপক ইলিয়াস উদ্দীন বিশ্বাস, অধ্যাপক আখতারুল ইসলাম, অধ্যাপক রাশেদ তালুকদার, অধ্যাপক কবির হোসেন, অধ্যাপক সৈয়দ সামসুল ইসলাম, অধ্যাপক কামাল আহমেদ চৌধুরী, ড. আনোয়ারুল ইসলাম, ড. রেজা সেলিম, ড. আশরাফ উদ্দীন, ড. আবদুল আউয়াল বিশ্বাস, ড. আতিউল্লাহ, সমিতির সাবেক সাধারণ সম্পাদক অধ্যাপক ফারুক উদ্দীন প্রমুখ বক্তব্য দেন। শিক্ষক সমিতি আজ ক্যাম্পাসে মৌন মিছিল বের করবে।

নাটক-কার্টুনে প্রতিবাদ : মানববন্ধন বিক্ষোভ ও সমাবেশের পাশাপাশি বিশ্ববিদ্যালয়ের বিভিন্ন সংগঠন কার্টুন ও পথনাটকের মাধ্যমে হত্যাকাণ্ডের প্রতিবাদ জানাচ্ছেন। রোববার ও সোমবার বিশ্ববিদ্যালয়ের প্রধান ফটকে ব্যঙ্গাত্মক কার্টুন বুলিয়ে রাখে সাংস্কৃতিক সংগঠন ‘কার্টুন ফ্যাক্টরি’। কার্টুন ফ্যাক্টরির আঁকা বিভিন্ন কার্টুনে ড. জাফর ইকবালের রক্তমাখা মাথা ও বিভিন্ন কথাবার্তা ফুটে উঠেছে। এছাড়া অর্জুনতলায়ও কার্টুন বুলিয়ে রেখেছে সংগঠনটি।

অন্যদিকে নাট্যসংগঠন দিক থিয়েটার ‘আততায়ীর খোঁজে, ফাল্গুনে পথে’- শিরোনামে ৪ দিনব্যাপী পথনাটকের আয়োজন করেছে। সোমবার বিশ্ববিদ্যালয়ের অর্জুনতলায় এমসি কলেজের ‘থিয়েটার মুরারিচাঁদ’-এর পরিবেশনায় ‘ব্লাড টেস্ট’ নামক পথনাটক মঞ্চায়িত হয়। ২ সপ্তাহের মধ্যেই শাবি সীমানা প্রাচীরের কাজ শুরু : ভিসি অধ্যাপক ফরিদ উদ্দিন আহমেদ সোমবার সাংবাদিকদের জানান, ২ সপ্তাহের মধ্যেই বিশ্ববিদ্যালয়ের সীমানা প্রাচীরের নির্মাণ কাজ শুরু হবে, যদিও এটা খুবই কঠিন একটি কাজ। হামলার বিষয়ে তিনি বলেন, আমরা জাফর ইকবালের হামলার বিষয়টি গুরুত্ব দিয়ে দেখছি। তদন্ত কমিটি কাজ করছে। তবে তদন্ত কমিটির সভাপতি অধ্যাপক আবদুল গণি মনে করেন সীমানা প্রাচীর কোনো সমাধান নয়। তিনি সাংবাদিকদের বলেন, ২৭ বছর ধরে বিশ্ববিদ্যালয় সীমানা প্রাচীর ছাড়াই চলছে। সীমানা প্রাচীর হলেই যে সমস্যার সমাধান হয়ে যাবে তা কোনোভাবেই বলা যায় না। কেন বারবার এ ধরনের ঘটনা ঘটেছে, সেদিকে মনোযোগ দেয়া উচিত। প্রস্টর সহযোগী অধ্যাপক জহীর উদ্দিন আহমেদও মনে করেন, সীমানা প্রাচীর খুব ভালো একটা সমাধান নয়। তবে সীমানা প্রাচীর হলে বিশ্ববিদ্যালয়ে কোনো একটা ঘটনা ঘটিয়ে দ্রুত পালিয়ে যাওয়ার সম্ভাবনা থাকবে না। এক্ষেত্রে সীমানা প্রাচীরের উচ্চতা যথেষ্ট হতে হবে। এদিকে ন্যাক্সারজনক সন্ত্রাসী হামলার প্রতিবাদে সিলেট মহানগরে বিভিন্ন সংগঠনের নিন্দা ও প্রতিবাদ অব্যাহত রয়েছে।

বিএনপি : হামলার তীব্র নিন্দা ও প্রতিবাদ জানিয়েছে বিবৃতি দিয়েছেন সিলেট জেলা ও মহানগর বিএনপি নেতারা। তারা ঘটনার সঙ্গে জড়িতদের কঠোর শাস্তি দাবি করেছেন। বিবৃতিদাতারা হলেন- সিলেট জেলা বিএনপির সভাপতি আবুল কাহের চৌধুরী শামীম, মহানগর সভাপতি নাসিম হোসাইন ও সাধারণ সম্পাদক বদরুজ্জামান সেলিম, জেলা সাধারণ সম্পাদক আলী আহমেদ।

সম্মিলিত সাংস্কৃতিক জোট : সোমবার নগরীর কেন্দ্রীয় শহীদ প্রাঙ্গণে প্রতিবাদ সমাবেশ করে সম্মিলিত সাংস্কৃতিক জোট সিলেট। জোটের সভাপতি আমিনুল ইসলাম লিটনের সভাপতিত্বে ও সাধারণ সম্পাদক গৌতম চক্রবর্তীর পরিচালনায় সমাবেশ অনুষ্ঠিত হয়। এতে জোটের সাবেক সভানেত্রী নাজনীন হোসেন, সাবেক সাধারণ সম্পাদক এনামুল মুনির ও শামসুল আলম সেলিম, আবৃত্তিকার মোকাদ্দেস বাবুল, সংস্কৃতিকর্মী ডা. নাজরা চৌধুরী, মুক্তাদির আহমেদ মুক্তা, আবিদ ফয়সাল ও বিথী সাইমুম প্রমুখ বক্তব্য দেন।

ধ্রুবতারা : সোমবার নগরীর কেন্দ্রীয় শহীদ মিনার প্রাঙ্গণে সামাজিক ও সাংস্কৃতিক সংগঠন ধ্রুবতারা মানববন্ধন ও প্রতিবাদ সমাবেশ করে। সংগঠনের সভাপতি মোহাম্মদ জহিরুল ইসলামের সভাপতিত্বে ও সাধারণ সম্পাদক আবদুল বাতিনের পরিচালনায় সমাবেশে সিলেট মহানগর ছাত্রলীগ সাধারণ সম্পাদক আবদুল আলীম তুষার, ধ্রুবতারার কেন্দ্রীয় সাংগঠনিক সম্পাদক মো. সাদিকুর রহমান, আবদুল হাই আল হাদী, বদরুল আহমেদ বুলবুল, এহসানুল করিম মিশু, বিপ্র দাস বিপ্লব প্রমুখ বক্তব্য দেন।

ভারপ্রাপ্ত সম্পাদক : সাইফুল আলম, প্রকাশক : সালমা ইসলাম

প্রকাশক কর্তৃক ক-২৪৪ প্রগতি সরণি, কুড়িল (বিশ্বরোড), বারিধারা, ঢাকা-১২২৯ থেকে প্রকাশিত এবং যমুনা প্রিন্টিং এন্ড পাবলিশিং লিঃ থেকে মুদ্রিত।

পিএবিএস : ৮৪১৯২১১-৫, রিপোর্টিং : ৮৪১৯২২৮, বিজ্ঞাপন : ৮৪১৯২১৬, ফ্যাক্স : ৮৪১৯২১৭, সার্কুলেশন : ৮৪১৯২২৯। ফ্যাক্স : ৮৪১৯২১৮, ৮৪১৯২১৯, ৮৪১৯২২০

E-mail: jugantor.mail@gmail.com

© সর্বস্বত্ত্ব স্বত্বাধিকার সংরক্ষিত ২০০০-২০১৮ | এই ওয়েবসাইটের কোনো লেখা, ছবি, অডিও, ভিডিও অনুমতি ছাড়া ব্যবহার বেআইনি।